

AKASHVANI AIZAWL
REGIONAL NEWS UNIT
REGIONAL NEWS BULLETIN
(MIDDAY)

Tuesday, April 21, 2026

Time - 2:30pm - 2:35pm



AMC POLLING DAY

Aizawl Municipal Corporation inthlanpui vote thlak mekah tun dinhmunah vote zaa 37.04 a tla.

AMC inthlanna ah hian ward 19 awmin, polling station 264 a awm a, vote thlak theih hun chhung hi zing dar 7 atanga tanin tlai dar 5 thleng hawn a ni ang.

AMC inthlanna tura vote nei awm zat chu hmeichhia nuai 1, sing 2, sang 9 leh 656 leh mipa nuai 1, sing 1 leh 333 an ni a, an vaiin vote nei hi mi nuai 2, sing 3, sang 9 leh 989 an awm a, mipa ai hmeichhia an tamna chu 19,323 a ni. Vote awm tamna ber chu ward 18-na niin, vote 18,906 an awm a. A tlemna ber ward 8-na-ah vote nei mi 7,975 an awm thung. AMC huam chhungah hian a veng bil ang a vote tamna ber chu ward number 2-na huam chhunga Bawngkawn Veng a ni a, vote 6,442 an awm a ni.

Tun tum hi AMC inthlan buatsaih vawi 4-na tur a ni a, AMC hnuai hian Ward 19 awmin, heta tanga Ward 6 (paruk) hi hmeichhe tana reserved a ni a, Local council 89 leh Polling Station 264 a awm mek a ni.



AMC POL PARTY LEADERS

Vawiin Aizawl Municipal Council inthlan vote thlak ni hian political party hruiute an chhuak tha hle a,

Chief Minister Pu Lalduhoma, Home Minister Pu K Sapdanga, Leader of Opposition Pu Lalchhandama, MNF President Pu Zoramthanga, MPCC President Pu Lal Thanzara, MPCC President Kalchhuak, Pu Lal Thanhawla, BJP State President Dr K Beichhua leh minister leh MLA thahnem tak an thawkchhuak a ni.

AMC inthlan ah hian rorel lai ZPM, bakah MNF leh MPCC te chuan ward 19 an chuh kim vek a. BJP chuan bial 11-ah candidate an nei a. Independent candidate an awm lo a ni. AMC bial/ward 19 zinga 6 chu hmeichhe tan chauha chuh theih tura ruat ni mah se, tu pawhin a chuh theih bialah hmeichhe candidate 7 an awm a, ZPM leh MPCC hmeichhe candidate 3-te'n tu pawhina chuh theih bial an chuh a, MNF hmeichhe candidate pakhatin a chuh bawk. Tun tum AMC inthlan chuhtu mi 68 zinga 28 te chu hmeichhia niin, INC leh ZPM-ah hmeichhe candidate 9 ve ve, MNF-ah 7 leh BJP-ah 3 an awm a ni.

Vawiina Vote thlak tura kal MPCC President hlui, Pu Lal Thanhawla chuan kan corr zawhna chhangin, politics khawvelah dikna in hmun chang se a tlo ber a ti.

AMC inthlan a, ward XVIII-a MNF Candidate Lalrina Renthlei chuan dik taka thiltih tha a tih thu kan corr zawhna chhangin a sawi a, thlan tlin anih chuan hriselna lama hmasawn nan infiamna lam awmze nei taka kalpui a tum thu a sawi a ni.

Minister Pu B Lalchhanzova chuan Aizawl khawpui enkawl tur Corporator 19 thlannaah mipuiin ZPM ah rinna an nghat chho hle ah a ngai tih a sawi a, ZPM chuan Municipal ah langtlang sorkar siam a inpeih a ni a ti.



FIRST TIME VOTER

Aizawl Municipal Corporation (AMC) inthlan vote thlak boruak muanawm tak hnuaiah tluang taka neih mek a ni a, tlai dar 5 thleng vote thlak theih hun hawn a ni.

Tun tum vote thlak zingah a vawi khat nana vote thlak te kan corr ten an kawm a, a phurawm an tih thu te an sawi a ni. Republic Venga First time voter kan corr in a kawmna lo ngaithla ang.

